



## STINAPA TA INFORMA

### BONERIANO KU SENTIMENTU LATINO

Un mucha hòmbèr di dos aña, yu di mayornan mishonero di Ekuador, a yega Boneiru na 1972. Su trayectoria profeshonal ta largu. Di Boneiru pa Merka (Florida i Virginia) kaminda el a optené su grado di bachier den sikologia. Despues na Boneiru el a sigui e estudio di P.A. pa bira maestro di skol. Na e momentu aki e ta trahando den turismo tambe. Su dos yu hòmbèrnan ta su orguyo. I aunke henter su famia despues di tantu aña a emigrá bai Merka, el a disidí konsientemente di keda aki. Ku boso: David Romo, e maestro di skol, sambuyadó ku un pashon i amor enorme pa Boneiru i su naturalesa. For di tempu ku e tabata hóben e tabata praktiká e deporte di buseo. Durante e último añanan e ta trahando duru pa optené su título di 'dive- master'. Su eksperensha di buseo e ta utilisá pa yuda e muchanan na Watapana skol. E ke konsientisá e muchanan tokante e importansha di protehá naturalesa. Especialmente esun bou di awa. David ke mira e muchanan di Boneiru stima nan naturalesa. Ademas, e ke stimulá e boneriano pa bira instruktor di buseo. "For di hóben semper mi tabata tin bon kontakto ku dive-mastèrnan lokal" David ta splika. Ta esaki a stimul'é pa un dia e mes bira dive-master. E ta haña un duele ku no ta mira hopi boneriano ta bira dive-master òf fungi den trabounan di buseo. Segun David, asta e turista ta reklamá esaki. "Pa mi naturalesa ta kreashon di Dios. Ta e kreashon di mas bunita ku Dios por a duna nos. Naturalesa pa mi ta lokual ta pone ABO den komunion ku BO mes i Dios." David ta sigui splika ku deboshon ku ta e bunitesa di naturalesa ta motiv'é pa lanta tur mainta i gradisí Dios. Pa David tur e matanan i bestianan den naturalesa ta demostrá ku Dios ta grandi i maravioso. Bonaire ta un isla ku ta rondoná ku tur sorto di variashon. Un turista ku ta apresia naturalesa no ta bini pa buseo so. Kòrda ku tin ta bini por ehèmpel pa e paranan i palunan tambe. Pa ekonomia e turismo ta masha importante. "Nos ta biba di dje." Boneriano òf ekuatoriano? "Mi ta un boneriano ku sentimentu latino" e ta terminá sonriendo. *Skirbí pa Natalie Wanga.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESA



**Traha huntu na un desaroyo duradero pa Boneiru**